

*Pupuk amalan minat  
membaca sebelum tidur*

# Sekolah sediakan buku log untuk diisi sebagai kerja rumah

Pesta Buku Antarabangsa Kuala Lumpur akan berlangsung mulai 24 April hingga 3 Mei 2015 di Pusat Dagangan Dunia Putra (PWTC), Kuala Lumpur, menawarkan pelbagai jenis bahan bacaan kepada pengunjung.

Program tahunan ini menerima sambutan pengunjung saban tahun. Dilaporkan lebih 1.7 juta pengunjung membanjiri pesta buku tahun lalu dan bilangannya dijangka meningkat lebih tinggi pada kali ini.

Walaupun ramai mengatakan aplikasi internet mewarnai bahan bacaan dunia alaf baharu, masih ramai yang sukakan bahan bacaan bertulis yang boleh dipegang dan diselak helainya. Bilangan pengunjung yang begitu ramai juga menjadi petunjuk semangat cintakan buku dan suka membaca berkembang baik dalam masyarakat.

Semangat cintakan buku dan suka membaca penting jika kita ingin menjadi masyarakat yang mempunyai daya fikir tinggi. Membaca menambahkan ilmu dengan lebih banyak fakta baharu diketahui.

Banyak membaca buku agama memberikan kita lebih pengetahuan mengenai ajaran agama dan membantu memperbaiki mutu amal ibadah serta kehidupan beragama. Banyak membaca buku motivasi membuka minda dan menjadikan kita lebih bersemangat mengharungi cabaran hidup.

Semakin banyak membaca, semakin kuat minda memproses, menjadikan kita semakin berilmu, matang dan menjadi insan lebih baik.

Firman Allah SWT yang bermaksud: "Adakah sama orang yang me-



Mengunjungi pesta buku antara cara meningkatkan minat membaca.

[GAMBAR HIASAN]

ngetahui dengan orang yang tidak mengetahui? Sesungguhnya orang yang dapat mengambil pelajaran dan peringatan hanyalah orang yang berakal sempurna." (Surah al-Zumar, ayat 9)

## Amalan baca buku sejak kecil

Semangat cintakan buku dan suka membaca bermula sejak seseorang itu masih kecil lagi. Ibu bapa adalah pihak pertama yang memperkenalkan nilai murni ini. Amalan membacakan buku kepada anak sebelum tidur mempercepatkan pembinaan sikap cintakan ilmu dan suka membaca.

Justeru, amalan membaca dan cintakan ilmu amat disukai dalam agama kita. Amalan membacakan buku kepada anak sebelum tidur agak kurang dalam masyarakat kita, tetapi menjadi amalan biasa masyarakat di Barat.

Statistik yang pernah dikeluarkan sebelum ini menyebut masyarakat kita masih belum mencapai tahap minat membaca yang diimpikan. Contohnya, seorang rakyat Australia membaca sekitar 180 buku setahun sedangkan rakyat Malaysia dikata-

kan belum sampai 10 buku setahun.

Semoga bilangan masyarakat kita yang suka membaca akan meningkat seiring dengan ramainya jumlah pengunjung pesta buku yang diadakan.

Justeru, bagi meningkatkan semangat suka membaca dan cintakan ilmu digalakkan juga kita mencontohi masyarakat yang terkenal dengan sikap sebegini. Di Australia, perpustakaan awam ditubuhkan di setiap seksyen penempatan penduduk untuk kemudahan akses kepada perkhidmatan itu.

Perpustakaan awam daerah membenarkan setiap kanak-kanak meminjam 30 buku sekali gus dan boleh memulangkannya di mana-mana perpustakaan berdekatan dalam tempoh dua minggu. Mereka juga memudahkan kaedah tempahan buku untuk peminjaman secara e-mel dan memperbaharui tempoh pinjaman secara dalam talian.

Bahkan setiap perpustakaan menjalankan bengkel percuma untuk ibu bapa mempelajari teknik membaca dengan anak sebelum tidur.

Sekolah di Australia turut menyebarkan semangat cinta membaca bu-

ku dengan menjadikan sesi membaca buku atau novel bersama ibu bapa di rumah sebagai kerja rumah setiap hari. Setiap murid akan diberikan buku log untuk catatan apakah buku yang dibaca sebelum tidur dan ibu bapa perlu menandatangani buku itu.

Kejayaan membaca buku paling banyak akan diraikan dalam sesi perhimpunan sekolah. Pelajar dipanggil ke hadapan pentas dan dianugerahkan lencana *Pupil of the Week* oleh guru besar. Usaha ini membuatkan kanak-kanak teruja dan menjadi kebiasaan murid sekolah rendah menghabiskan 30 buku seminggu.

## Bina kreativiti, penguasaan bahasa

Seorang guru besar sekolah di Australia turut menceritakan usaha menggalakkan kanak-kanak membaca novel atau buku cerita bertujuan membantu mereka membina kreativiti dan penguasaan bahasa. Mereka tidak menggunakan kaedah hafalan seperti 'prosa kata, bentuk ayat, kata-kata hikmah' secaraendirian, tetapi ia dipelajari melalui penceritaan dan penggunaannya dalam novel.

Kerja sekolah bagi kanak-kanak sekolah rendah (7 hingga 12 tahun) adalah membaca buku cerita dan novel serta membuat ringkasan dalam buku log. Mereka membina sikap cintakan buku dari kecil dan membuatkan ia menjadi sebahagian daripada tabiat harian.

Apabila kanak-kanak dididik suka membaca sejak kecil, ia akan menjadi tabiat yang akan dibawa hingga mereka dewasa seterusnya membentuk keluarga. Apabila ibu bapa mempunyai sikap suka membaca, ia akan diturunkan pula kepada anak untuk turut sama cinta membaca dan mencari ilmu.



## Penulis

Prof Madya di Akademi Pengajian Islam Kontemporari (ACIS), UiTM Shah Alam



DR NURHIDAYAH HASHIM